




0,00 €

A PIAZZETTA

informazione corsa, azizume è scherzu • #30 • estate 2017

**DUMANE
TUTTI
AGRICULTORI**



USA

iè, hè tuttu veru! attualità



I Turchi cù i turchini

U Sporting Club di Bastia si ne fala forse in Lega 2, ma ùn hà micca persutu tuttu. Nanz'à a partita di cuppa d'Auropa contr'à Lyon, certi sustenidori di u club di u Besiktas d'Istanbul anu tenutu à affissà nant'à e rete suciale u so sustegnu à u club corsu.



Guerra di e stelle

U nome maschile chì hà cunnisciutu a crescita a più forte in u 2016 à i Stati Uniti hè « Kylo », cum'è Kylo Ren, u persunagiu di Star Wars. Senza cuntà ch'elli sò nati 303 Anakin annu passatu. Essendu datu chì a Corsica hà sempre dece anni di ritardu, da quì à pocu videremu nasce i primi « Paulu Chewbacca » o « Dark Antone ».




Droga nostra

A legenda di a mafia corsa dice chì i capimachja di u banditisimu nustrale anu sempre vulsutu scantà l'isula da u trafficu di droga (ma forse serà statu dinù chì u mercatu era troppu chjucu tandu). À vede a crescita di a cunsumazione di cuccaina, l'affari sò belli scambiati. In un articulu di Le Monde di u 18 d'aprile scorsu, un pulizzeru spiega chì un trafficu novu s'hè messu in ballu. A pulveretta bianca s'hè democratizata in pochi anni, à tal puntu chì e bande maffiose anu u ventu in poppa : « *la demande est tellement soutenue qu'il y a à bouffer pour tout le monde* ». È sopr'à tuttu, per ciò chì hè di i cunsumadori è i trafficanti, ùn si tratta più di marginali o di strangeri, ma di Corsi : « Un trafic organisé en Corse, par les Corses et pour les Corses ». È quale simu ?



Rainbow flag è lotta nazionale

Avemù trovu stu bellu affissu nazionalistu di l'anni 80 à l'Archiviu di Bastia. I so cuncepitori averanu vulsutu fà un'ochjata à u rainbow flag, chì hè a bandera di u movimentu LGBT dapoi a fine di l'anni 70 ?



31 anni di prigìo per nunda contr'à un sceccu di 75 dollari

Lawrence McKinney hè statu cundannatu per avè furzatu una donna à 115 anni di prigìo. Ma un testu ADN l'hà innucentatu, 31 anni di prigìo dopu. In cambiù, hà ricevutu un sceccu di 75 dollari da u statu di u Tennessee.



E donne più forte ch'è l'omi

D'appressu à l'inchiesta di u Projet Voltaire, e donne facenu menu sbagli d'ortografia è di grammatica ch'è l'omi.



U Fronte à vende

Serà ch'ellu ùn ci hè nimu chì pò dumandà diritti d'autore ? O chì in una sucetà induve u cunsumerismu finisce pè richjappà tuttu, tuttu si ritrova à vende ? U fattu si stà chì oghje, a fiura di u FLN si ritrova cummercializata in robba pè turisti...



A biera più forte ch'è u Doliprane

Sò i circadori di l'università di Greenwich in Inghilterra chì l'anu trova. Contr'à u dolore, dui bichjeroni di biera facenu u listessu effettu ch'è a prese di paracetamolu. A prussima ch'è vo biite, dite ch'è vo site in trattamentu.



Una sucetà di più in più inghjista

L'istitutu Oxfam hà publicatu un studiu nant'à l'inegalità in u mondu. U menu ch'ellu si pò dì hè ch'elle crescenu di più in più in furia. In u 2016, 8 persone pussedenu a stessa ricchezza (426 miliardi di dollari) ch'è a metà di a pupulazione a più povera (3,6 miliardi di persone).

Erano :

- 159 in u 2012
- 92 in u 2013
- 80 in u 2014
- 62 in u 2015
- 8 in u 2016



L'ultima cacciata di Jean Lassalle

U candidatu à a presidenziale preferitu di i nazionalisti corsi hà fattu un cumentu stranu à prupositu di e scole immersive di u Paese Bascu, l'ikastola. Interrugatu nant'à ciò ch'elle pudianu purtà e "lingue regionale", hà dichjaratu :

"Beaucoup de choses, à condition qu'on l'apprenne par l'école de la République au lieu de l'apprendre par des voies détournées où l'apprentissage de la langue n'est pas toujours l'objectif premier de ceux qui vous l'apprennent. Je suis bien placé pour vous le dire parce que je suis député du Pays Basque et j'en ai tellement souffert, d'écoles dont la spécialité première n'était pas d'apprendre la langue. C'était d'apprendre autre chose et parfois même le maniement des armes. Vous comprenez ?"

Un argumentu chì face pensà à i pro-CFR chì dicianu chì l'Università di Corsica era u locu induve s'amparava à entre à u FLNC. Davant'à a pulemica, Jean Lassalle s'hè scusatu : "Je demande pardon à l'ensemble des Basques et à l'ensemble des peuples

qui auraient pu se sentir offensés. Je me suis exprimé de manière catastrophique, j'ai tenu des propos indignes de moi."



Siscaux II, u ritornu

U 21 maghju, un omu hè statu vistu in traccia di pregà in djellabà, à u mare di Siscu. L'infurmazione face scaldà di manera seria e rete suciale è u cornu hè sunatu. 24 ore dopu, s'ampara chì u magumettanu chì manca pocu di fassi pista hè di fatti un tippu chì facia u yoga. Hà da esse periculosa ancu quessa avà.



Trump cunnosce a Corsica

Avà sapemu chì u presidente americanu Donald Trump ci cunnosce. Nant'à Facebook è Twitter, hà publicatu sta carta chì mostra i lochi di a so visita : Arabia Saudita, Israele, Italia è Belgica. Ma per ellu, a Corsica face parte di l'Italia.



Santa Cunsumazione, pregate per noi

In Corse-Matin di u 6 di maghju avemu amparatu ch'ellu hè statu benedettu un supermercatu in Portivechju. Normale, i tempi di a cunsumazione sò quelli chì ricevenu u più mondu in Corsica.



Avanzemu ?

A "Gazzetta di Parma" hè u grande cutitanu di a regione di Parma, in Italia (tiratura di 50.000 giurnali à ghjornu). Dop'à ogni partita di u club di futbol di u Parma Calcio, si ponu leghje in e pagine spurtive e note di i ghjucadori in lingua parmigiana, ch'elli chjamanu "pramzàn". Avanzemu forse, ma d'altri a facenu più in furia ch'è noi.




U partitu animalistu

Cun 2,87% di i voti, hè in a prima circunscrizzione di Corsica Suprana chì u partitu animalistu hà realizatu u so risultatu u più forte. Serà per via di a passione corsa di a scimia ?

54% di i Francesi sò felici di vede à Bastia falà in Lega 2

Hè un sundagiu Odoxa / RTL chì a dice.



In Via

Pudemu felicità u gruppu chì vene di sorte u so primu discu « Una cria di quì ». In a squadra intrenata da Filippu Guerrini, capimachja è battore, ritruvemu à Mariangh-jula Agostini à u cantu, Nicolas Pasquali à u violinu, Rémi Roustan à a bassa è Florian Guéniot à a ghitarra. I testi sò firmati da Marcu Biancarelli, Jean-Yves Acquaviva è Olivier Ancey (vi v'è?). E musiche di Tonton è Florian Guéniot. Ma cumu definisce u so stile musicale? Li avemu dumandatu: « Un suppu di folk, duie cuchjarine di pop, un buchjere di vechju whisky irlandese, dui figli d'India, un zinzicu di pive-rone orientale, un beat di Rock'n'roll sputicu, un rail di cocaïne nustrale, qualchì riucata addisperata è un soffiu à quellu locu ». È nunda ch'è per quessa, u vi racummandemu.



Ci hè un dettu chì dice « ùn ti ne ride di u mo u dolu, quandu u meiu serà vechju, u toiu serà novu »... I sustenidori aiaccini ùn anu mancatu di sorte stu ritratu dop'à a falata di Bastia.



Una carta di a Corsica

Pocu cunnisciuta, sta pittura à l'affrescu di u 1573 si pò vede in u munasteru di San Giovanni Evangelista di Parma. Si trovanant'à i muri di a biblioteca. Tutta affrescata, hè un giuiellu di u Rinascimentu. A decurazione hè stata cumandata da l'abate Stefano Cattaneo di Novara. Hè discrittu cum'è un abate ribellu, in cunflittu cun l'autorità di a chjesa perchè vulia un dialogu cù e religione. Hè cusì chì in sta magnifica biblioteca ci truverete scrizzioni in latinu, grecu, arabu, ebraicu, è cirillicu. À mezu à quessa, sta bella carta di a Corsica.



Bettunizazione è a privatizazione di u mare in Sardegna

A battaglia pè a difesa di u liturale ùn hè micca propria à a Corsica. In Sardegna dinù l'appittiti sò grandi. In Portu Ferru, vicinu di Sassari, hè nata una mossa contr'à u pianu d'utilizazione di u mare. In una natura salvatica sò previsti trè stabilimenti di mare cun parasoli, cabine, carreghe longhe è spugliatoghji. Parechje centinaia di persone si sò mubilizzate per difende l'ambiu. In Corsica, quelli chì difendenu u liturale sò minacciati è piglianu i colpi. À parte quessa, tuttu v'è bè.



La valise ou le cercueil

Sciences et Avenir è *Le Monde* anu cunsacratu un articulu à a scupertà archeologica eccezzionale di Lanu (in Vallerustie). Duie casce in legnu vechje di 3000 anni è cunservate bè sò state trove in una grotta impuntificata è difficile d'accessu.

PATRIMONIU IN PE TAMANTA STRAGE



U conventu d'Orezza

Altu locu di a nostra storia, stu conventu di u XV^u seculu hà vistu parechje cunsulte. A più famosa, in u 1735, dichjarava a Corsica indipendente. Arruvinatu durante a segonda guerra mondiale, più nunda pò parà a so trafalata. Una petizione lanciata in u 2012 lampava un SOS. Dapoi, cuntinuveghja di sprufundassi.



U conventu di Boziu

Quessu dinù hà vistu un'episodiu di a storia corsa. In u 1757, Matra è i so partigiani anu intrappulatu à Paoli chì s'hè chjosu in u conventu. Riesce à salvassi grazia à l'aiutu di e truppe di Cervoni di Suveria, venutu pè succorrelu. Hè quì chì Matra serà tombu. Oghje i muri minaccianu è u campanile hè statu scapatu. Ci la feremu à salvà u conventu ?



E muraglie di a citatella di Bastia

Pensate ch'ella hà avanzatu a cuscenza di u patrimoniu ? Fidighjate à Bastia, induve u prugettu di custruzione di u futuru liceu maritimu scambia a citatella. È nant'à e muraglie ghjenuvese di u XV^u seculu, sò stati messi unepochi di... parpaings. Cumu avè cunfidenza pè a seguita di u prugettu ?

RÌCULU !

Durante anni è anni, si pensava chì a Corsica ùn avia nè storia, nè patrimoni. U so passatu ùn avia nisun interessu, i so abitanti nisun sapè fà. Un populu di pastori è di paisani fora di a Storia. Ci n'hè vultutu tempu per cambià e mentalità. Pianu pianu i Corsi principianu à piglià cuscenza di l'impurtanza è a ricchezza di u so patrimoni corsu. Ma ferma tantu à fà. Sopr'à tuttu, ùn pensate micca ch'è no ci semu ghjunti...



Casa ghjenuvese in Furiani

Sta bella casa campagnola, testimone di a messa in valore di i duminii agriculi in piaghja si trova in bor'di strada. 500 anni di storia chì si ne falanu oghe in ruvina.

Casa in Petranegra

In Petranegra ci hè una bella casa in petre. Un prugettu di a municipalità prevede di lampalla in pianu per costruisce un... parking. Una petizione hè nata nant'à u net per circa di salvalla. Ùn ci serà veramente micca d'altre suluzione per mette e viture ?

Paddaghju

A sapete chì hè in Corsica ch'ellu si trova u situ di u Mediterraniu induv'ellu ci hè u più stàntare ? Ci n'hè più di 250. Ci vole à andà in Paddaghju (scrittu à quandu "Palaghju", à quandu "Pagliaju") vicinu à Tizzà, nant'à a cumuna di Sartè. U locu hè abandonatu cumpletu. È certi megaliti ùn si vedenu più, sò piattati sott'à i muhji è aspettanu...





Perchè dumane seremu tutti agricultori

Un a sapete forse micca, ma dumane seremu tutti pruduttori di ciò ch'è no manghjeremu. È s'ella era quessa a vera rivuluzione ? Eccu perchè hè una bona nutizia.

1. Per manghjà megliu

Troppu inzucaratu, troppu grassu, troppu salitu... L'Organizazione mundiale di a salute s'inchieta di a malnutrizione è di l'abitudine alimentare ch'è no avemu pigliatu. A suluzione saria d'avè un'alimentazione più sana, d'origine vegetale.

2. Per ùn esse più avvelenati

Manghjà 10 frutti è legumi à ghjornu ? Ok perchè micca. Ma s'ellu hè per manghjà robba tracarca di pesticidi, di fertilizanti è di prudutti chimichi surtiti da ind'è Monsanto, ùn hè micca sigura ch'ella sia megliu. Senza parlà di a pulluzione chì arruvina a terra è di u trasportu caru in petroliu. Tandù, u megliu saria di falli da per voi.

3. Perchè venenu da troppu luntanu

Avucati di u Perù, kiwis di Nova Zelanda, aranci di Sudafrica... A frutta ch'è vo cumprate hà girandulatu più ch'è voi è custatu litri è litri di fuel. Serà normale, quandu certi ponu esse coltivati in Corsica ?

4. L'avvene hè l'agricultura urbana

Ùn avete micca un ortu da cultivà in paese ? Nisun prublema. A cità americana di Detroit hè stata durante anni è anni u simbulu di l'industria americana. Cù a disindustrializzazione, hè oghje diventata u simbulu di l'agricultura urbana. A crisa è u disimpiegu anu trasformatu a cità. S'hè sviluppata di manera tremenda l'agricultura urbana è i giardini cumunitarii. In cità dinù si pò cultivà è pruce, puru nant' à i tetti, e terrazze, i balconi, i lochi publichi, i giardini... Pruvate ?

5. Pè riappropriassi u so paese

Cumu serà chì certi ùn

coglienu mancu più i frutti in i so paesi ? Per curciura ? Per vergogna ? Si tuttu ognunu turnessi à cultivà (puru appinuccia) un pezzu di lenza, pulisce i so arburi è coglie i so frutti, saria digià un bellu prugressu.

6. Perchè face prò

Travaglià in a natura, à l'aria pura, viota u capu à face prò. Chì tanti running, pruvate u zapping !

7. Pè u ligame suciale

Perchè quandu si face l'ortu, si dumanda à l'antichi, à i vicini, à quelli chì sanu... è si mostra, si trasmette à i giovani.

8. Per imbellisce

Un ortu serà sempre più bellu ch'è un parking.

9. Perchè ci vole à mantene a diversità

Pocu à pocu, ci hè ancu un'uniformizzazione di e culture. A mudernizzazione è l'intensificazione di l'agricultura hà fattu calà di manera forte e varietà di piante è arburi cultivati. In Corsica dinù c'erano tante varietà lucale. Di a cinquantina di varietà di

castagne riferenzate quarant'anni fà, qunantu ne ferma oghje ? A cipolla di Siscu è quella di Moita sò salvate. Ma quantu spezie propie à un rughjone o un paese si seranu perse ?

10. Per cultivà a differenza

Oghje, tuttu u mondu si sente l'anima d'un rivuluziunariu, tuttu u mondu hè naziunalistu, simu tutti ribelli è avemu tutti l'appiccicoghju di Che Guevara... è sì u veru anticunfurmisimu era di travaglià a terra ?

11. Pè riciclà megliu

S'è vo travagliate a terra, averete infine l'utilità d'un « composteur » pè riciclà i vostri rifiuti verdi.

12. Per cambià di ritimu

Campemu in un'epica chì v'è troppu in furia. Ci vole à avè tuttu, è subitu. Ùn si piglia più u tempu per nunda. È s'è no pruvavamu di campà à u ritimu di a natura è di e stagione ? Rallentisce u ritimu per campà megliu, eccu una bella sfida.

13. Per ùn esse più dipendenti di i supermercati

A Corsica hè forse « souvent conquise, jamais soumise », ma i so abitanti sò belli dipendenti di i supermercati è di i centri cummerciali. Ùn riescerete forse micca

à esse cumpletamente indipendente. Ma si pò pruvà di cultivà, appena...

14. Per produce

Tuttu u mondu face u custattu chì a Corsica deve produce, sorte d'un tippu d'ecunomia induve tutta a mercanzia vene da fora. Ma viderete chì u piacè hè grande quandu u vostru giardinu ferà i so primi legumi, i so primi frutti dop' à parecchie settimane di travagliu... lè, hè una vera soddisfazione di produce da e so mane.

15. Per arrestà di cunsumà troppu

In e nostre sucetà occidentale avemu pigliatu l'abitudine di cunsumà troppu. Si compra sempre più ch'è ciò ch'è no avemu bisognu. Diventà prудuttore, hè dinù circa di produce ciò ch'è no avemu bisognu, senza fanne troppu. Hè forse qui, a vera rivuluzione.

16. Perché ùn hè micca un'affare di babà cool

In u 2050, ci seranu 10 miliardi d'abitanti nant' à a Terra. I dui terzi di a pupolazione seranu citatini. È ci vulerà chì a prудuzione alimentaria cresci di 70 % per nutrisce à tutti. U prezzu di u petroliu dinù hà da cresce. L'agricultura urbana ùn hè micca un cosu per bobo alternativu, serà

una necessità. L'avvene, hè à a prудuzione locale, ùn averemu micca a scelta !

17. Perché ancu Pasquale Paoli...

Postu chì u Babbu di a Pàtria ùn hè mai statu cusì à a moda, è s'ella vi ci vole quessa per cunvincevi, sappiate ch'ellu hè u Generale à avè introduttu in Corsica a cultura di u pomu. À tal puntu chì i so nemichi l'avianu cugnumatu pè ridesi d'ellu "u generale di e patate". Si ancu Paoli s'era messu à zappà l'ortu...



Cugnomi di paesi :

a Casinca



À ogni paese, u so cugnome scherzosu. Quandu sò stati dati, da quale è perchè ùn si sà. Ma sò a prova chì dapoi sempre, i Corsi anu purtatu un sguardu scherzosu nant'à elli. Dop'à Capicorsu, Nebbiu, Boziu è Niolu, eccu a Casinca.

U Castellà

Castellaresi cavalieri
Castellaresi eranu stati da veru boni cavalieri ? O u cugnome serà ironicu ?
O forse, purtavanu à u Medievu u titulu di cavaliere (francese « chevalier ») ?
Per avà, ùn si sà...

L'Oretu

Lordacci signori, o caproni (o capruti ? o capre ?)
Quì dinù, ùn si sà sì u cugnome hè ironicu.
Lordacci eranu di più signori ? O si pigliavanu per d'altri ? Eranu dinù chjamati caproni. Quì pò u sensu si capisce.

A Penta

Pentulacci ristaghjoni
A « ristaghja », o « rustaghja » hè un arnese campagnolu pè dirascà.

Porri

Belle mele le Purrinche

Sorbu

Belle donne le Surbinche
I cugnomi di Porri è U Sorbu si facenu chjama è rispondi.
A loda diventa scherzu, cumplimenti à a bellezza di e donne... è paragone cù e mele di u paese vicinu.
È dinù : I Cannettali, forse perchè ch'elli facianu e baracche in piaghja cù e canne.

A Venzulasca

Venzulaschesi ranuchjaghji
Quelli chì manghjanu e ranochje. Hè un cugnome chì volta spessu in i paesi induve ci si trova acqua è padule, cum'è in San Fiorenzu.

U Viscuvatu

Viscuvacci battagliaieri, signori. O fumuti
Dui paesi chì concorrenu pè u titulu di signori, si vede chì a Casinca hè una pieve di sgiò ! Più, à chì ùn spasseghja chè à cavallu, à chì battaglia, simu quì in lochi di gran risaltu. È simu ancu stunati chì A Penta è A Venzulasca ferminu cusì mudesti !

Ocagnanu

Mazze è corne ucagnesi
Di regula a formula hè "mazze è corne è bastunate", detta dinù irunicamente "battuti, curnuti è cuntenti", vale à dì "ghjucati à a risa senza pudè di nunda".

Per fà sta raccolta, vuleriamu ringrazià quelli chì ci anu aiutatu : Anghjulina è Isabella Antonetti, Jo Desideri, Marie-Jo Filippetti.

Ci semu aiutati dinù di u libru di Paul Arrighi, Le livre des dictons corses (edizione Privat) È di a raccolta di l'associu culturale A Falce.

parole d'oghje

u lessicu di Zenbucucciu

S'è vo ùn l'avete ancu intese, ùn tricherete tantu. Parolle nove n'avemu bisognu da sprime a realtà cumplexa di a Corsica oghjinca cun eleganza è spìritu. Eccu dunque un strattu di u picculu dizziunariu di A Piazzetta.



bisunorsu /n./ ; orsucciu rusinu, vizzusellu è dolce cum'è un agnellu chì si vuleria basgià à tutti quelli o quelle chì facenu u passa è veni nant'à u corsu. Corti hè sempre stata a cità di i bisunorsi.



hanunà /v./; esse, senza sforzu, vulgare, connu è suldaghju. Cirillu, chì hè sempre statu una vera zucca, hanuneghja nant'à C8.

tinorussi(-sce) /v. / ; turnà rossu imbacatu à u sente d'una voce di crooner. Maria a mea, tinorussia quandu cantava Franck Sinatra .

e to popcornè sì ! /spr. /; traduzione vegetariana di a sprissione « e to corne sì !»

bigdattà /v. / ; raccoglie infurmazioni diverse da cunnosce tutta a vita d'una persona. I flicchi chì bigdatteghjanu i studenti sò stumacati da e duckface !



tartignollu (-a) /ag./ ; sinonimu di buffu(-a), di ridiculu(-a) Quandu, à l'ottantina passata, Stella Maria facia u moonwalk paria appinuccia tartignolla.

girlì (-sce) da l'inglese girl, girlie /v./; fà ch'ella si spannessi a so parte feminine. Girliscenu i muderni cacciadori chì piglianu isse machje incù tenute à fruffrù.



U dissegnu di Lawra :



<http://lawra.fr>

photo : lbouba



U CIBC v'accumpagna
per fà un bilanciù di
cumpetenze


cibc
www.cibc-corse.fr



A
10 anni
30 numeri
3 000 articuli nant'à u web
450 000 giurnaletti spachjati di rigalu...

PIAZZETTA

... è sempre quì!



CUMU TRUVÀ UN'IMPIEGU IN CORSICA ?

Per truvà un'impiegu in Corsica, ci vole à :

Cunnosce un elettu



Mette da cantu i diplomi
ch'è tù ai buscu



Accettà una paga di nunda



Accettà d'esse u servu
di u turisimu



Accettà di fà u servu in u BTP



Accettà d'esse cummandatu
da una narpia chì ne sà
menu ch'è voi



Accettà i calci in culu
di u patrone



Parte in esiliu



È finisce azezu, stumacatu,
poveru è in depressione.





#30

CAPIREDATTORE : Petru Paulu de Casabianca
 CUURDINAZIONE : Sarah Defranchi
 CUPRENDULA : Lisandru Ristorcelli
 REDAZIONE : Petru Paulu de Casabianca,
 Ghjuvanfilippu Taddei
 DISSEGNI / ILLUSTRAZIONE : Laura Paoli,
 Paulu Felice Colombani, Florian Rosi,
 Sebastien Dellapina
 INFUGRAFIA : Flora Ambrosini
 MESSA IN PAGINA : Xavier D. de Casabianca
 CUNTATTU / PUBBLICITÀ : Sarah Defranchi
 s.defranchi@live.com - 06 69 23 19 30
 NANT'À E RETE SUZIALE
 FACEBOOK : Più di 22 850 fans
 TWITTER : Più di 13 100 followers
 INSTAGRAM : Più di 3 900 abbonati

Susteniteci !

A Piazzetta sorte tutti i trè mesi...
 ...ùn mancate un solu numeru !

ABBUNAMENTU : 4 nùmeri 20 € sustegnu 40 €
 Integralità di i vechji nùmeri 45 €

nome.....
 casata.....
 indirizzu.....

Mandate u vostru sceccu à l'ordine di :

ASSOCIU LINGUA SCRITTA
 1, carrughju Canònicu-Bartoli
 20 200 BASTIA



A pillula da ingolle per fà passà e nutiziacce

*lè ma capisci, ùn ci hè più soldi
 lè ma capisci, o fratè semu obligati
 lè ma capisci, on a pas le choix
 lè ma capisci, ça va créer des emplois*

A PIAZZETTA hè :

UNA RIVISTA

- 15.000 esemplarii tutti i trè mesi distribuiti di regalù
- 500 punti di diffusione in a Corsica sana

UN SITU INTERNET

- 50.000 visite à mese

Vulete fà a vostra publicità nant'à a nostra rivista o u nostru situ internet ?

Cuntattate à :
sarah@apiazzetta.com
 06.69.23.19.30
www.apiazzetta.com





Ci Campemu!

- Figurette
 - Libri
 - Sinemà
 - Teatru
 - Musei
 - Ballu
 - Festivali
 - Cuncerti
- BD
 - Livres
 - Cinéma
 - Théâtre
 - Musées
 - Danse
 - Festivals
 - Concerts



DES ENTRÉES

GRATUITES

ET DES RÉDUCTIONS

POUR

TES SORTIES

CULTURELLES

N° Vert 0 800 001 004

APPEL GRATUIT DEPUIS UN POSTE FIXE



www.passcultura.corsica

conception: CORSICASCOPE - 06 81 674 895 - crédit: BD - Hertz, tome 5, par Eric Adam, Didier Comand, Denis Falque, Christian Gae © Glémi 2015